



सत्यमेव जयते

**GOVERNMENT OF MIZORAM**

**BUDGET 2015-2016**

**(Vote on Account)**

*atana*

**MIZORAM LEGISLATIVE ASSEMBLY**

*a*

**PU LALSAWTA**

**HON'BLE FINANCE MINISTER**

*thusawi*

*Thawhlehni, July ni 7, 2015*

## **2015-16 VOTE ON ACCOUNT PAHNIHNA A FINANCE MINISTER THUSAWI**

Pu Speaker,

I remtihain he House zahawm takah hian kum 2015-16 chhunga Vote on Account pahnihna atan August, September leh October thla chhunga Sorkar sum lo hman lailawk tur chu ka rawn pharh e.

Vote on Account hmasa a ka lo sawi tawh chhan hrang hrangte avang khan tunah pawh hian theihtawp kan chhuah chungin Regular Budget kan pharh leh thei ta lova, remchang hmasa berah Regular Budget hi pharh vat kan tum a ni.

Sorkar Laipui a Ministry hrang hrangte atangin Centrally Sponsored Schemes (CSSs) a Sorkar Laipui leh State Sorkarin sum an intum sem dan tur bithliah chiang fek fawka hriattirna kan la dawng lova, hei hian Regular Budget min pharh tir theih loh phah ta a ni.

Fourteenth Finance Commission-in chhiah hrang hrang tlingkhawm atanga State Sorkar chanvo tur chu za zelah sawmthum pahnih atangin sawmli pahnih-ah tisang bawh mahse, Hmarchhak State ten Special Category Status an neih thin chu tih tawp a lo nih tak avangin Mizoram chauh ni lo Hmarchhak State dangte pawn sum leh pai lamah harsatna lian tak an tawh phah ta a ni. A chhan bulpui ber pawh Centrally Sponsored Schemes hrang hranga State Sorkarin a lo do let ve na chu tihsan a lo nih tak vang a ni. Chuvang chuan keini ang State pachhe tan chuan a hma a Centrally Sponsored Schemes kan lo kalpui ve tawh tawh thinte pawh engemaw zat chu kan kalpui zui thei lo mai thei a ni.

Mizoram mai bakah Hmarchhak State tangrual chuan Sorkar Laipui-ah he Special Category Status hi ti bo lova chawinung leh turin kan ngen reng a, Sorkar Laipui atanga chhanna lawmawm kan beisei mek a ni.

Heng bakah hian North Eastern Council (NEC) leh Ministry of Development of the North Eastern Region (DoNER) atanga kan sum hmuh zat tur hi kan la chiang thei lo cheu bawk a. Heng atanga kan sum hmuh thinte hi kan State Plan sum zat tur hriltu an nih bawk si avangin tun dinhmunah chuan Vote on Account pharh leh mai loh chu tih theih dang kan nei lo a ni.

Tichuan, Pu Speaker, I remtihna leh kan Governor zahawm takin a recommend angin, Mizoram Sorkarin kum 2015 August thla atanga October thla thlenga sum a lo hman lailawk tur Vote on Account, **Rs. 18,23,81,44,000 (cheng vaibelchhe sangkhat zariat sawmhnih pathum nuai sawmriat pakhat singli leh sangli)** chu he House zahawm takah hian ka pharh e. He House zahawm tak hian kan dinhmunte hrethiam a min pawmpui ngei ka beisei.

Ka lawm e.